

現代生活藝術系列

# 華嚴經疏論纂要 16

— 華藏世界品之一 —

華藏淨宗學會印贈

大方廣佛華嚴經疏論纂要卷第十六

五臺山清涼國師澄觀疏鈔

太原方山長者李通玄 論

閩鼓山私淑比丘道需纂要

華藏世界品第五

之一

○初來意

〔疏〕來意者。前品通明諸佛刹海。今此別明本師所嚴依果。答世界海問。故次來也。

○第二釋名

〔疏〕釋名者。準梵本。具云華藏莊嚴嚴具世界海之

徧清淨功德海光明品。譯者嫌繁。乃成太略。處中  
應云。蓮華藏莊嚴世界海品。謂蓮華含子之處。自  
之曰藏。今刹種及刹。爲大蓮華之所含藏。故云華  
藏。其中一一境界。皆有刹海塵數清淨功德。故曰  
莊嚴世界深廣。故名爲海。有云。世界依海。故立海  
名者。恐非文意。以下云。華藏莊嚴世界海。住在華  
中。故約事可爾。何因刹海。相狀如斯。略舉二因。一  
約衆生。如來藏識。卽是香海。亦法性海。依無任本。  
是謂風輪。亦妄想風。於此海中有因果相。恒沙性  
德。卽是正因之華。世出世間未來果法。皆悉含攝。

故名爲藏。若以法性爲海。心卽是華。含藏亦爾。然此藏識相分之中。半爲外器。不執受故。半爲內身。執爲自性。生覺受故。如來藏識。何緣如此。法如是故。行業引故。二約諸佛。謂以大願風。持大悲海。生無邊行華。含藏二利。染淨果法。重疊無礙。故所感刹。相狀如之。是以出現品中。多將世界以喻佛德。細尋文意。乃由佛德。世界如之。鈔約事可爾下。覈其本源。不爲此釋。

豈委刹海之典由

○第三宗趣

〔疏〕宗趣者。別顯本師依報。具三世間融攝無盡爲

宗。令諸菩薩發生信解。成就行願爲趣。餘如前品。但總別異耳。融攝之相。亦見前文。賢首立華藏觀。復有十德。大同小異。如彼文說。鈔言有十德者。前品已引。

論將釋此品。畧作十門分別。一釋品來意。二釋品名目。三釋華藏世界海因何報得。四釋華藏世界形狀安立。五配華藏世界安立屬因。六釋華藏世界海純襍無礙。七釋華藏世界海圓攝三世業境。八釋華藏世界本空出生所緣。九明華藏世界因何得隱現自在。十隨文釋義。一釋品來意者。此品答前三十七問中佛世界海。衆生海。波羅蜜海等。

此品舉如來五位中行業因果報得。答前三十七問。故此品須來。二釋品名目者。爲說此佛境界報得之士。蓮華所持。含藏一切淨穢境界皆在其中。故名華藏。三釋華藏世界因何報得者。以從初信心。至於八地已來。恒以大願力。持令其不退菩提諸波羅蜜海。教化饒益一切衆生。至於八地。任利無功。當知風輪是大願波羅蜜所成報故。衆生世間妄想業風所持。如來世間以大願力智風能持諸境。爲以智能隨願。願能成智。還以大願法身大智之所報。成風輪之體。若無法身。一切諸行總有爲。

故若無智願。法身無性。不能自成。何況成他。以此三事爲緣。方堪利生。不滯空有。進修功熟。任利無功。夫報不虛得。皆有所因。若不知因。云何修果。是故此品之初云。此華嚴莊嚴世界海。是毘盧遮那如來。往昔於世界海微塵數佛。一一佛所。淨修世界海微塵數大願之所嚴淨。但云願者。爲行由願成。又下云。普賢智地。行悉成。一切莊嚴從此出。如香水海。大慈悲業之所報得。香水河是進修之行。之所報得。如下文殊師利常隨衆中。總以名表法。卽見名知行。如此華嚴世界海。見果知因。不可別

引餘經。將來證此。此經見名卽知法。見果卽知因。方可識此經之意趣。餘經法相門戶。多不與此經相應。餘經云苦諦。此經云苦聖諦。卽義有餘。餘經說四諦。此經說十種聖諦。及十二因緣。若廣說。無量差別。不可卒申。以是義故。此配因果。不可引於餘教。配此經文。此經見名知行。以果識因。四釋華嚴世界海形狀者。以無盡大願風輪。持大悲水生無邊行華。以法性虛空能容萬境。重疊無礙。於其水上。生一大蓮華。周空法界。各種種藥香幢。明根本智。起差別智。行差別。行名藥香幢。於蓮華內。



日珠王寶上。有大輪圍山。經云。日珠王蓮華之上者。只是華內有寶。名日珠王。非別有華也。其寶所成林樹香水。妙華開敷。經自有文。具陳其事。五配華藏世界海安立屬因者。夫果不自生。從因而得。經云。廣大願雲周法界。於一切劫化羣生。普賢智地行悉成。所有莊嚴從此出。如經總舉不可說佛刹微塵數世界種者。明普賢行攝化之境。徧法界。故卽是座內衆。眷間衆。所行覺行報得之境。總是都舉果行圓周之境。於彼但言佛世界微塵衆。對不可說佛刹微塵數。於彼是略舉數。此是廣數。如

說曾賢之行。且但言萬行。此是畧言。意在無盡等法界行也。卽此二重舉果中曾賢滿行。卽如座內衆眷間衆。卽此華嚴莊嚴世界海不可說佛刹微塵世界種。如天帝網。分布在種種藥香幢大蓮華之中。是其彼果行所攝生報滿果所得之境。今在經中。不舉大數。但舉中心十一箇世界種。上下二十重。重別相去一佛刹塵。最下重世界。各有一佛刹塵世界。周而圍遶。而在其中。次上第二重中。卽云二佛刹世界。周而圍遶。次上第三重中。卽言三佛刹塵數世界。周而圍遶。以次向上。一重加一。直

至最上重世界中。有二十佛刹塵世界周而圍遶。此中心十一箇世界種總皆如是。此明十一地行門進修攝化境界報得。中心十一箇卽十一地報得。上下二十重漸漸增廣者。明十一地行門中。一地有兩重因果。爲地地進修中。皆一正果。一向果。其二十重中所有佛號。皆是勝進中因果佛也。所有世界。是隨位中所化之境界也。卽明十一地進修攝化層降佛果故。各隨位配之。可見除此十一箇世界外。周圍別舉出一百箇世界種者。卽明此十一地攝化十波羅蜜行。徧輪圍山法界內故。且

隨方次第。各有其十。都言一百。明徧不可說佛刹  
塵境界滿故。近金剛輪圍山周圍有十箇世界種。  
上下有四重者。明十一地中四攝法徧故。餘九十  
箇世界種不云重數者。明但是十波羅蜜十中具  
百所攝化境故。此是一箇因果竟。六釋華藏世界  
純徧無礙者。爲佛所行之行。徧法界衆生界故。既  
是行徧。所得依果亦徧。但業不相應者。同居而不  
見。猶如靈神及諸鬼趣。與人同處。人不能見。如經  
云。譬如人身。常有二天隨逐。天常見人。人不見天。  
此經爲佛行周徧。依正亦徧。不同三乘推淨土於

餘方。而致去來自他之相。爲彼小心根劣者。且如是設教網故。畢竟求大菩提心者。還須歸此不二之門。與徧周法界之行願也。七明華藏世界圓攝三世業境者。此華藏世界海。明此教法。一念三世故。一念者。爲無念也。無念卽無三世古今等法。以明法身無念。一切衆生妄念三世多劫之法。不離無念之中。以是義故。此華藏世界所有莊嚴境界。能現諸佛業。衆生三世所行行業因果。總現其中。或過去業現未來中。或未來業現過去中。或過去未來業現現在中。或現在業現過去未來中。如百

千明鏡俱懸四面。前後影像互相徹。故爲法界之體性。無時故。妄計三世之業。頓現無時法中。是故經言。智入三世。而無來往。經云。佛子。汝應觀刹種威神力。未來諸國土。如夢悉令見。十方諸世界。過去國土海。咸於一刹中。現像猶如化。三世一切佛。及其國土。於一刹種中。一切悉觀見。論主頌曰。三世無有時。妄計三世法。以真無妄想。一念現三世。三世無時者。亦無有一念。計著三世法。總現無時中。了達無時法。一念成正覺。八釋佛國本空。何爲華藏世界出生所緣者。緣何事意。緣意有四。一

爲明二乘雖得解脫三界麤業。無有福智。不利衆生。滯於涅槃。二爲三乘菩薩有樂生淨土。淨相常存。障法性如理。染淨當情。知見不會。情存淨土。不得自在。不如此法隱現自在。爲利衆生。顯勝福德。故卽具相萬差。光明顯照。若令衆生情無取著。如幻雲散。一物便無。無有所得。存其繫故。三爲怖一切法空。衆生爲法空無相之理。謂言斷見。空無福智。不樂觀空。樂取相縛。隨境存業。不能解脫者。所現福德。依正果故。令觀空法。空卻無明。成福德業。四總爲一切三乘。及一切凡夫。現廣大願。行福智。

境界量度椽式。令其做學。不偏執故。經云。諸佛國土。如虛空無等。無生無有相。爲利衆生。普嚴淨本願力。故任其中。九明華藏世界。因何得隱現自在者。爲從一切法空之理。隨智現故。得隱現自在。世間龍鬼。具有三毒。猶能隱現。何況法空。空諸三毒。純清淨智。不能隱現自在。如善財入彌勒樓閣。以三昧力。具見衆莊嚴。從三昧起。忽然不見。一相都無。善財白言。此莊嚴何處去。彌勒答言。從來處去。曰。從何處來。曰。從菩薩智慧神通來。依菩薩智慧神力而住。無有去處。亦無住處。非集非常。遠離一



切。又如幻師。作諸幻事。無所從來。無所至去。雖無來去。以幻力故。分明可見。彼莊嚴事。亦復如是。無所從來。亦無所去。雖無來去。然以慣習。不可思議。幻智力故。及往昔大願力故。如是顯現。華藏世界。亦復如是。以如來大願智力。法性自體空無性力。隱現自在。若隨法性。萬相都無。隨願智力。衆相隨現。隱現隨緣。都無作者。但以理智。法爾自具。不思議功。不思議變。無能作者。自在隱現。凡夫執著。用作無明。執障。既無智用自在。順法身。萬象俱寂。隨智用。萬象俱生。隨大悲。常居生處。隨理智。生處恒。

真以此三事。隱顯萬端不離一真之智。化儀百變。十隨文釋義者。此一品經。長科爲十二段。如文具。

○第四釋文。一品分三。初明華藏因果自體。二明藏海安布莊嚴。三明所持剎網差別。三段如次釋華藏莊嚴世界之名。今初二。先長行。後偈頌。長行亦二。初舉果屬人。顯因深廣。二彰果體相。辯其寬容。今初。

爾時普賢菩薩。復告大衆言。諸佛子。此華藏莊嚴世界海。是毗盧遮剎如來。往昔於世界海微塵數劫修。

菩薩行時。一劫中親近世界海微塵數佛。一佛所淨修世界海微塵數大願之所嚴淨。

〔疏〕謂指此刹海是我本師修因所淨。然因深廣有

三勝相。一長時修刹海塵劫故。不唯三祇。二於多

劫。一遇多勝緣。不唯勝觀釋迦等佛。三於多勝

緣。一淨多大願。願淨國等。不唯淨一無生等。由

上三重故云深廣。鈔初華藏等者。然第二安布莊嚴亦是果相故。應對果分因。總

為二段。謂先明利因。後彰果相。以第一段長行具

有因果。偈文雙頌因果。故合於因屬自體中。不唯

勝觀等者。俱舍論第十八說。於三無數劫。各供養

七萬。又如次供養五六七千佛。三無數劫。滿逆次

逢勝觀。然燈寶髻佛。初釋迦牟尼。釋曰。此二偈中

初偈。明供養佛數。謂初無數劫。供養七萬五千佛。

第二無數劫。供養七萬六千佛。第三無數劫。供養七萬七千佛。後頌明逢何佛供養。言逆次者。從第三無數劫向前。以明謂第三無數劫滿。逢勝觀佛。第二無數劫滿。逢然燈佛。第一無數劫滿。逢寶髻佛。最初發心。逢釋迦佛。發誓願言。願我當作佛。一如今世尊。彼佛世尊。末劫出世。法住千年。今我如來。一。回彼故。今疏云。不唯勝觀者。舉第三阿僧祇劫滿佛。言釋迦者。舉初發心之佛。而言等等者。乃有三義。一。等然燈寶髻。二。等所供佛數。三。等餘教所明。設言供養三十六恒。二十八恒佛等。皆未足為多也。不唯淨一無生忍者。如智論說。五華供養然燈。得無生法。忍故。金剛經云。若有少法可得。然燈佛。則不與我授記等。無法可得。是無生相。而言等等者。等餘法門。供舍頌云。但由悲愍。被折心無忿。讚歎底沙佛。次無上菩提。六波羅蜜多。於如是四位。一。二。又。一。二。如次修圓滿。釋曰。初之四句。卽是四位。初位一滿。謂普施成檀。次位二滿。謂尸及忍。被折不報。故能滿尸。由內無忿。故成於忍。第三位中。但一度滿。謂精進度。第四位中。定慧雙滿。故云。一。二。又。一。二。等。言底沙者。此云圓滿。讚佛偈云。

天地此界多聞室。逝宮天處十方。無丈夫牛王大沙門。尋地山林徧無等。七日七夜忘下一足。歎底沙故。超於彌勒九劫。先成佛。智論之中。亦同此說。故六度滿。前後不多。今經一一佛所淨修。世界海微塵數大願。况於多佛。况多劫耶。然瑜伽起信等。故疏結云。由上三重。故云廣深。約三乘教。一方化儀。一類世界。定說三祇。今約一乘。該通十方。及樹形等界。故云利海塵數。是以寶雲經言。我爲淺識衆生。說三僧祇劫修行。然我實經無量。阿僧祇劫修行。又時無別體。依法上立法。既無盡時。亦無窮况。念劫圓融。不應尅執。時無別體下。別教一乘融攝。以說如毘目仙人執善財手。時經多劫。處處無邊。故不可以長短思也。若顯超勝。一生頓圓。若約甚深。多劫莫究。故云不可定執。費在入玄。

○二諸佛子下。彰果體相者。植因既深。果必繁  
與。然所依利量。諸教不同。小乘但一娑婆。三乘  
有大小之化。或色究竟爲實。或他方別有淨邦。  
今一乘十佛之境。大小無礙。淨穢相融。且依一  
相說。有邊表實則一重。橫尋無邊。况復重重。塵  
含法界。鈔然所依下。彰其分量。言大小之化者。如梵網經周而千華上。復現千釋迦。卽  
大化也。一華百億國。一國一釋迦。卽小化也。小  
化唯一四洲。大化總該百億。且依一相者。且依  
一種義。相不壞邊表。有蓮華外別佛刹海等實  
則稱性。橫不可尋。故云法界無差別。若以性融  
相則一塵中。然準下別顯。應有十事。一所依風  
法界無盡。然準下別顯。應有十事。一所依風  
輪。二風持香海。三海出蓮華。四華持刹海。五繞

臺輪山。六臺面寶地。七地有香海。八海間香河。九河間樹等。十總結多巖。今文之中。唯闕一河。文且分四。第一能持風輪。第二所持香海。第三海出蓮華。第四華持利海。應有十事者。以文廣釋十事故。此中長行畧標列故。是以古德一品之中。先分土因。就果相中。卽分十段。今不依者。以下六事。各有長行偈頌。而前四事。同一長行。故科十段。於文不便。先科爲三。於第一華藏自體長行之內。方分爲

四耳

○今初風輪

諸佛子。此華藏莊嚴世界海。有須彌山微塵數風輪所持。其最下風輪。名平等住。能持其上。一切寶燄熾

然莊嚴。次上風輪名出生種種寶莊嚴。能持其上淨  
光照耀。摩尼王幢。次上風輪名寶威德。能持其上  
一切寶鈴。次上風輪名平等燄。能持其上日光。明相摩  
尼王輪。次上風輪名種種普莊嚴。能持其上光明輪  
華。次上風輪名普清淨。能持其上一切華燄師子座。  
次上風輪名聲徧十方。能持其上一切珠王幢。次上  
風輪名一切寶光明。能持其上一切摩尼王樹華。次  
上風輪名速疾普持。能持其上一切香摩尼須彌雲。  
次上風輪名種種宮殿遊行。能持其上一切寶色香  
臺雲。諸佛子。彼須彌山微塵數風輪。最在上者。名殊



勝威光藏

〔疏〕風輪之因。即大願等。亦如前釋。於中文三。初總標數。二其最下。畧列名。三諸佛于下。別舉最上。列中名平等住者。一徧持諸位故。二稱實性故。餘名可知。風並在下。寶在臺面。以力遙持。鈔以力遙持。一云。一重風輪持一重物。疏以出現品中。古有二釋。有十風輪持欲色等。皆是遙持。故今案定。三舉最上者。勝力能持香海。故立其名。

○第二所持香海

能持普光摩尼莊嚴香水海

〔疏〕以摩尼發光普照一切嚴海底岸。及寶色香水。

故立此名。又藏識名海。具德深廣。故流注名水。利那性故。又佛性名水。遠熏名香。聞未證故。鈔又佛性名水下。約通生佛。佛性卽是真法性故。故此品初。海表三義。今舉其二。畧不說悲。

○第三所出蓮華

此香水海有大蓮華。各種種光明藥香幢

**疏**所出蓮華。藥放異光。又發勝香。高出降伏。故立

此名。又所發萬行。一覺性故。曰光明。皆能普熏。

卽香義也。鈔又所發萬行。下。上約事釋。此約表法。但通相表行。若別說者。畧示十德。表於

十度。開敷鮮榮。以表施度。二自性無染。以表戒度。三香氣芬馥。四寶莖堅固。五寶葉扶疎。六寶藥光幢。七相巧成就。八含藏蓮子。九寶臺堅住。十普放光明。下八如次顯於八度。

○第四所持刹海

華藏莊嚴世界海住在其中。四方均平。清淨堅固。金剛輪山周匝圍繞。地海衆樹各有區別。

〔疏〕所持刹海四方均平。總顯形相。清淨堅固。彰其體性。金剛圍等。別明所有。卽下別顯。此爲其本。一山。二地。三海。四樹。各別區分。卽總顯多嚴。但闕一河。以下有別顯。故此畧明。下亦畧頌。

是時普賢菩薩欲重宣其義。承佛神力。觀察十方而說頌言。

世尊往昔於諸有

微塵佛所修淨業

故獲種種寶光明

華藏莊嚴世界海

廣大悲雲徧一切

捨身無量等刹塵

以昔劫海修行力

今此世界無諸垢

〔疏〕第二偈中。然長行偈頌。有十例五對。謂有無。廣

畧。離合。先後。爲八。九。或超間。十。或頌已重頌。故釋

頌文。不可一例。上下準之。此文畧有四例。一宿因

現緣。經離頌合。鈔一宿因現緣者。此中名長行爲

別相修多羅故。言經離者。宿因。即顯因。廣現緣。即前風持香海等。此二明離。言頌合者。初偈頌總

前半宿因。後半現緣。第二偈三句宿因。第四句是現緣故。二所成果相。經畧頌

廣。二所成果相者。長行云。華藏世界海。住在其中者。即所成果相。此文則畧。以十偈之內。皆有果

相。故云。三現緣風輪。經廣頌畧。三現緣風輪者。經列十種風輪。偈中但云。風力所持無動搖耳。四山地海樹。經有頌無者。長行云。金剛輪山周匝圍繞。地海衆樹各有區別。此經有也。頌無可知。上言有四者。但有四例。唯廣畧一種。乃成一對。離合有無。但成一例耳。若成對者。應須經合頌離。經無頌有。方成三對。餘四例二對。此中則無下頌。十偈分二。初二頌上因相。卽辨因招果。

放大光明徧住空

風力所持無動搖

佛藏摩尼普嚴飾

如來願力令清淨

普散摩尼妙藏華

以昔願力空中住

〔疏〕餘頌果相於中分四。初一偈半。頌風輪。皆上句所持。下句能持。初半偈以果持果。後偈兼明能成。

之因。前半離障。願令清淨。故後半無礙。願依空在。故

種種堅固莊嚴海

光雲垂布滿十方

諸摩尼中菩薩雲

普詣十方光熾然

〔疏〕二有一偈頌香海。尋此了名

光燄成輪妙華飾

法界周流靡不徧

一切寶中放淨光

其光普照衆生海

十方國土皆周徧

咸令出苦向菩提

寶中佛數等衆生

從其毛孔出化形

梵王帝釋輪王等

一切衆生及諸佛

化現光明等法界

光中演說諸佛名

種種方便示調伏

普應羣心無不盡

〔疏〕三有三頌半。頌蓮華。初一偈半釋種種光明藥。則顯此華以寶爲體。次一偈釋香義。就法以明寶中出佛。佛出世主。如從質發香。遠熏之義。後一釋幢義。演佛是高出義。調生是摧伏義。

華藏世界所有塵

一一塵中見法界

寶光現佛如雲集

此是如來刹自在

廣大願雲周法界

於一切劫化羣生

普賢智地行悉成

所有莊嚴從此出

疏四有二頌。明刹自在。總頌上所持刹海。初偈自在。一稱性故。卽同時具足相應門也。心塵準思。寶光現佛者。依正互融。故後偈結歸普因。故能含攝。初華藏因果自體竟。

○第二別顯安布莊嚴。文分爲六。第一四周輪山。二寶地。三香海。四香河。五樹林。六總結。各別有偈。今初輪山。則清淨戒德。內攝外防之所成也。

爾時普賢菩薩復告大衆言。諸佛子。此華藏莊嚴世界海大輪圍山。住日珠王蓮華之上。旃檀摩尼以爲



其身威德寶王以爲其峯。妙香摩尼而作其輪。燄藏金剛所共成立。一切香水流注其間。衆寶爲林。妙華開敷。香草布地。明珠間飾。種種香華處處盈滿。摩尼爲網。周而垂覆。如是等有世界海微塵數衆妙莊嚴。

疏長行中三初總舉所依。山所依處卽地面四周。日珠王者所依處地。故舊經云。依蓮華日寶王地。住所以地受此名者。前華各種種光明藥。偈中云。光燄成輪。又云。一切寶中放淨光。明知此華以寶爲體。是則如日輪之珠王爲蓮華也。斯卽總華之稱。一栴檀下。別顯體相。前取堅利。且云金剛。今明

具德畧有十相。前四自體圓滿。後六外相莊嚴。一身爲總形。摩尼圓明。栴檀芬郁。皆戒之德也。二山峯。謂秀出孤絕。威伏諸惡。三山輪。古有二義。一山彎曲之處。二山腹臍出。如師子座。半月爲輪。準下偈文。輪居山下。爲山所依。四成山之緣。上舉三事。各別有體。今顯金剛。內含光燄。徧成其體。如世土石雜而成山。金剛徧故。得金輪名。餘六文顯。竝在山間。三如是下。結德無盡。

爾時普賢菩薩欲重宣其義。承佛神力。觀察十方而

說頌言

世界大海無有邊

寶輪清淨種種色

所有莊嚴盡奇妙

此由如來神力起

〔疏〕應頌有十。文分爲二。前六明山體相莊嚴。頌前別顯。後四辨山妙用自在。亦顯依正無礙。卽頌前結文前中五。初一總頌圍山。初句所圍。次二句能圍。後句出因。言無邊者。有其二義。一但總相顯多。故云無邊。實有邊表。二說有圍山外者。是無邊之邊。不礙理而卽事故。今云無邊者。是邊之無邊。不壞相而卽理故。

鈔是無邊之邊者。意明理無分限。總曰無邊。事有分限。故各有邊。若依理成事。理性全隱。則無邊卽邊。若會事歸理事。相全盡。則無邊。今則不爾。不失理而現事。云

無邊之邊不壞事而理顯云邊之無邊此是事理無礙義不是相卽相作之義思之

摩尼寶輪妙香輪妙香及以真珠燈燄輪

種種妙寶爲嚴飾 清淨輪圍所安住

〔疏〕二有一頌頌前山輪

堅固摩尼以爲藏 閻浮檀金作嚴飾

舒光發燄徧十方 內外映徹皆清淨

〔疏〕三一頌山體。

金剛摩尼所集成 復雨摩尼諸妙寶

其寶精奇非一種 放淨光明普嚴麗

〔疏〕四一頌成山之緣。

香水分流無量色

散諸華寶及栴檀

衆蓮競發如衣布

珍草羅生悉芬馥

無量寶樹普莊嚴

開華發藥色熾然

種種名衣在其內

光雲四照常圓滿

**疏**五六二偈。頌前水等諸嚴。及加衣等

無量無邊大菩薩

執蓋焚香充法界

悉發一切妙音聲

普轉如來正法輪

諸摩尼樹寶未成

一一寶未現光明

毗盧遮那清淨身

悉入其中普令見

諸莊嚴中現佛身

無邊色相無央數

悉徃十方無不徧

所化衆生亦無限

一切莊嚴出妙音

演說如來本願輪

十方所有淨刹海

佛自在力咸令徧

〔疏〕後四妙用自在。並顯可知

○第二臺面寶地。卽體心性定之所成也

爾時普賢菩薩。復告大衆言。諸佛子。此世界海大輪圍山內所有大地。一切皆以金剛所成。堅固莊嚴。不可沮壞。清淨平坦。無有高下。摩尼爲輪。衆寶爲藏。一切衆生種種形狀。諸摩尼寶。以爲間錯。散衆寶末。布以蓮華。香藏摩尼。分置其間。諸莊嚴具。充徧如雲。三

世一切諸佛國土所有莊嚴而爲校飾。摩尼妙寶以爲其網。普現如來所有境界。如天帝網於中布列。諸佛子。此世界海地有如是等世界海微塵數莊嚴。

〔疏〕長行文三初標所在。二一切下。別顯體相莊嚴。有十句。初一地體。標以金剛。釋以堅固不壞。徧華藏地。盡是金剛。故上菩提場地。徹華藏也。二地相平淨。餘八皆莊嚴。謂三飾以寶輪。四畜以寶藏。五間以異寶。六散以寶末。七布以蓮華。八分置香摩尼。九克以莊嚴具。但云諸嚴。嚴有多少。三世佛國之嚴而爲嚴者。顯無盡之嚴具也。十覆以寶網。隱

映莊嚴網。有何用。普現佛影。此網何相。如天帝網。而布列也。又此帝網。重現無盡。成上普現如來境界。及上一境界。皆無盡也。鈔但云諸嚴下。此句稍長。故牒釋之。卽從諸莊嚴具下。是第九句。摩尼妙寶下。皆第十句。三諸佛子下。總結。

說頌言

其地平坦極清淨

安住堅固無能壞

摩尼處處以為嚴

眾寶於中相間錯

金剛為地甚可悅

寶輪寶網具莊嚴

蓮華布上皆圓滿

妙衣彌覆悉周徧



菩薩天冠寶瓔珞

悉布其地爲嚴好

栴檀摩尼普散中

咸舒離垢妙光明

寶華發燄出妙光

光燄如雲照一切

散此妙華及衆寶

普覆於地爲嚴飾

**疏**偈有十頌。分二。前七頌前別顯。後三頌總結。前中三。初四頌前八段。而小不次者。顯前無優劣。故或重或廣者。顯義無方也。恐繁不配。可以意得。

密雲興布滿十方

廣大光明無有盡

普至十方一切土

演說如來甘露法

一切佛願摩尼內

普現無邊廣大劫

最勝智者昔所行 於此寶中無不見

疏次二頌嚴具如雲。

其地所有摩尼寶 一切佛刹咸來入

彼諸佛刹一一塵 一切國土亦入中

〔疏〕後一偈頌如天帝網。謂一寶既收一切。則彼刹諸塵復攝一切。卽重重也。

妙寶莊嚴華藏界 菩薩遊行徧十方

演說大士諸弘願 此是道場自在力

摩尼妙寶莊嚴地 放淨光明備衆飾

充滿法界等虛空 佛力自然如是現

諸有修治普賢願

入佛境界大智人

能知於此刹海中

如是一切諸神變

〔疏〕後三偈頌總結者。結其所屬。初偈結屬道場。次屬佛力。後結能知之人。

○第三地面香海者。上之大海。既是藏識。今明心華之內。攝諸種子。一一種子。不離藏識海。故有多香海。然一一具於性德。故皆有莊嚴。

爾時普賢菩薩。復告大眾言。諸佛子。此世界海大地中。有十不可說佛刹微塵數香水海。一切妙寶莊嚴。其底妙香摩尼莊嚴其岸。毗盧遮那摩尼寶王以爲

其網香水映徹具衆寶色充滿其中。種種寶華旋布  
其上。梅檀細末澄迤其下。演佛言音。放寶光明。無邊  
菩薩持種種蓋現神通力。一切世界所有莊嚴悉於  
中現。十寶階陛行列分布。十寶欄楯周而圍繞。四天  
下微塵數一切寶莊嚴芬陀利華敷榮水中。不可說  
百千億那由他數十寶尸羅幢。恒河沙數一切寶衣  
鈴網幢。恒河沙數無邊色相寶華樓閣。百千億那由  
他數十寶蓮華城。四天下微塵數衆寶樹林。寶燄摩  
尼以爲其網。恒河沙數梅檀香諸佛言音光燄摩尼。  
不可說百千億那由他數衆寶垣墻。悉共圍繞周徧。

嚴飾

〔疏〕長行分二。初總舉數。準下刹種及梵本中。皆有十不可說。今闕十字。或是譯人之漏。或是傳寫之失。下標種處亦然。二一切下。別顯莊嚴。準後總結。應云。一香海。各有若干莊嚴。今文畧無。若按文取義。一切之言。卽一切海。總以妙寶而爲其底等。文有二十句。前十明海體狀。一底。二岸。三網。四水。五華。六塗。七聲。八光。九人衛現通。十結廣無盡。後十寶。下十句攝異莊嚴。唯白蓮華當於水中。餘皆在岸。言十寶者。有云。金。銀。瑠璃。砮磈。瑪瑙。珊瑚。琥。

珀、真珠、玫瑰、琴瑟爲十。十中前七卽是七寶。芬陀  
 利者卽白蓮華亦是正敷榮時。尸羅幢者應云試  
 羅。此云美玉。若言尸羅。此云清淨。二義俱通。餘竝  
 可知。以法門合之可以意得。（鈔）芬陀利卽白蓮華  
 者卽唐三藏等諸師  
所翻而言亦是正敷榮時者卽什公意故獻公法  
 華序云華有三時之異華而未敷名屈摩羅彫而  
 將落名迦摩羅處中盛時名芬陀利生公亦云器  
 像之妙莫踰蓮華蓮華之美榮在始敷始敷之盛  
 則子盈於內色香味足謂之芬陀利意亦同  
 也今存二譯各是一義梵語多含故兩存耳  
 爾時普賢菩薩欲重宣其義承佛神力觀察十方而

說頌言

此世界中大地上  
 有香水海摩尼嚴

清淨妙寶布其底

安住金剛不可壞

香藏摩尼積成岸

日燄珠輪布若雲

蓮華妙寶爲瓔珞

處處莊嚴淨無垢

香水澄淨具衆色

寶華旋布放光明

普震音聲聞遠近

以佛威神演妙法

〔疏〕頌中菩薩持蓋經有頌無日燄珠輪經無頌有。且分爲二。初三頌初十句。一頌底。二頌岸及網。瓔卽網類。三頌餘七。細尋可見。

階陛莊嚴具衆寶

復以摩尼爲間飾

周迴欄楯悉寶成

蓮華珠網如雲布

摩尼寶樹列成行

華藥敷榮光赫奕

種種樂音恒競奏

佛神通力令如是

種種妙寶芬陀利

敷布莊嚴香水海

香燄光明無暫停

廣大圓滿皆充徧

明珠寶幢恒熾盛

妙衣垂布爲嚴飾

摩尼鈴網演法音

令其聞者趣佛智

妙寶蓮華作城郭

衆彩摩尼所嚴瑩

眞珠雲影布四隅

如是莊嚴香水海

垣墻繚繞皆周匝

樓閣相望布其上

無量光明恒熾然

種種莊嚴清淨海



毗盧遮那於往昔

種種刹海皆嚴淨

如是廣大無有邊

悉是如來自在力

〔疏〕餘七偈頌後十句。而小不次。謂一頌階陛欄楯。

二頌樹林。三頌華敷。四頌幢相。五頌城珠。六頌墻

閣。繚者纏也。七頌結嚴屬佛。一昔因。二現力。

○第四海間香河。卽隨一一心同時相應功德流

注也。鈔卽隨一一心者。大海旣喻藏識。小海復表種子。二皆心王故。河表同時心所。謂善

十一。徧行別境。二千福河流。注心地。

爾時普賢菩薩復告大衆言。諸佛子。一一香水海。各

有四天下微塵數香水河。右旋圍繞。一切皆以金剛

爲岸。淨光摩尼以爲嚴飾。常現諸佛寶色光雲。及諸  
衆生所有言音。其河所有漩復之處。一切諸佛所修  
因行種種形相皆從中出。摩尼爲網。衆寶鈴鐸。諸世  
界海所有莊嚴悉於中現。摩尼寶雲以覆其上。其雲  
普現華藏世界毗盧遮那十方化佛。及一切佛神通  
之事。復出妙音稱揚三世佛菩薩名。其香水中常出  
一切寶燄光雲相續不絕。若廣說者。一一河各有世  
界海微塵數莊嚴。

疏長行亦三。初舉數。二一切下辨嚴。嚴事竝無差  
別。故云一切皆以。謂竝用寶體寶嚴。聖靈游集光。

雲相映。萬象浮輝。十句可知。三若廣下。結廣中。既繞小海之小河。已有刹海塵數之嚴。彌顯諸標結文。非唯約事。皆是一多無礙耳。

爾時普賢菩薩。欲重宣其義。承佛神力。觀察十方而說頌言。

清淨香流滿大河

金剛妙寶爲其岸

〔疏〕偈中初半偈。頌岸體金剛

寶末爲輪布其地

種種嚴飾皆珍好

寶階行列妙莊嚴

欄楯周迴悉殊麗

眞珠爲藏衆華飾

種種纓鬘共垂下

〔疏〕次一偈半。頌摩尼巖岸

香水寶光清淨色

恒吐摩尼競疾流

眾華隨浪皆搖動

悉奏樂音宣妙法

〔疏〕三一頌光雲言音。

細末梅檀作泥塗

一切妙寶同洄瀆

香藏氤氳布在中

發燄流芬普周徧

河中出生諸妙寶

悉放光明色熾然

其光布影成臺座

華蓋珠瓔皆具足

摩尼王中現佛身

光明普照十方刹

以此爲輪嚴飾地

香水映徹常盈滿

〔疏〕次三皆頌旋濬出影。

摩尼爲網金爲鐸

徧覆香河演佛音

克宣一切菩提道

及以普賢之妙行

〔疏〕七頌網鐸垂覆及總現諸嚴前現事嚴此說道  
行

寶岸摩尼極清淨

恒出如來本願音

一切諸佛曩所行

其音普演皆令見

〔疏〕八頌現佛依正。

其河所有漩流處

菩薩如雲常踊出

悉徃廣大剎土中

乃至法界咸充滿

〔疏〕九頌浪出妙音。

清淨珠王布若雲

一切香河悉彌覆

其珠等佛眉間相

炳然顯現諸佛影

〔疏〕十頌水出光雲。更有影畧。可以意得。

○第五河間華林

爾時普賢菩薩復告大衆言。諸佛子。此諸香水河兩  
間之地。悉以妙寶種種莊嚴。一一各有四天下微塵  
數衆寶莊嚴。芬陀利華周匝徧滿。各有四天下微塵  
數衆寶樹林次第行列。一一樹中恒出一切諸莊嚴  
雲。摩尼寶王照耀其間。種種華香處處盈滿。其樹復

出微妙音聲。說諸如來一切劫中所修大願。復散種種摩尼寶王。充徧其地。所謂蓮華輪摩尼寶王。香燄光雲摩尼寶王。種種嚴飾摩尼寶王。現不可思議莊嚴色摩尼寶王。日光明衣藏摩尼寶王。周徧十方。普垂布光網雲摩尼寶王。現一切諸佛神變摩尼寶王。現一切衆生業報海摩尼寶王。如是等有世界海微塵數。其香水河兩間之地。一一悉具如是莊嚴。

〔疏〕長行有二。初總標。次一一下。別顯二事。謂華及樹。水陸各一。實有多事。然此一段。文勢少異。不列十事。以顯無盡。而但舉一。展轉明多。謂初一白蓮。

後一寶樹。於此一樹出五業用。一出莊嚴雲。二寶  
王照耀。三華香盈滿。四出音演法。五雨寶徧地。於  
中文有總別及結。別有八事。通三世間。初六現器  
次一現正覺。後一現衆生世間。如劔葉林等。現惡  
業報。天意樹等。卽善業報。男女林中。朝生暮落。皆  
業報海。鈔如劔葉林者。其林樹葉。猶如刀劔。下卽  
傷人。天意樹者。涅槃四十二問中。當第二  
十四問云云。何觀三寶。猶如天意樹。言天意樹者。  
隨天意轉。故至第九經。方始答之云。復次善男子。  
如菴羅樹。及閻浮提樹。一年三變。有時生華。光色  
敷榮。有時生葉。滋茂蒼鬱。有時彫落。狀若枯死。善  
男子。於意云何。是樹實爲枯死。不耶。不也。世尊。善  
男子。如來亦爾。於三界中。示三種身。有時初生。有  
時長大。有時涅槃。而如來身。實非無常。釋曰。意明  
三寶隨物轉變。而實常存。如天意樹。隨天意轉。而



實不灰。隨天之意。明是善業。男女林者。卽楞伽第一百六問。云何男女林。一百七問。云何訶梨勒。阿摩勒。解曰。謂令觀世間。如男女林等。依立世阿毘曇論第一云。閻浮提林外。有二林。一名訶梨勒。二名阿摩勒。此二林南。復有七林中。有人林。是人林中。果形如人。如閻浮提勝人。王種。若男子十六歲。如女一十五歲。莊嚴具足。狀如行嫁。是人林果。可愛。如是。其于蒂形。如人頭髻。未離欲者。見此果子。便生愛心。諸外道等。有離欲人。若見此果。卽失禪定。欲心還生。其子熟時。唯鳥競食。鳥食之餘。殘落於地。如屍陀林。甚可厭惡。退禪定者。見是相已。淺生厭離。還得本定。意表世間男女如林。所見榮飾。悉皆如幻。與此無別。徧計所執。妄謂之實。菩薩觀之。都無所有。故楞伽云。觀諸衆生。如灰屍。無知。以妄想故。見有往來。若離妄想。如彼灰屍。無鬼入中。云爲自在。故有經說。菩薩所見世間資生。無非實相。此之如是等下。且結樹之。雨寶。已有利海塵數。謂矣。

例上出雲等四。一一皆然。一樹之中。已有多刹海。

之嚴矣。次例芬陀利華亦同於樹。其華與樹各有  
四天下塵。一一皆爾。如華樹等類。復應有刹海塵  
數之物。故爲無盡之嚴也。其香水下總結。

爾時普賢菩薩欲重宣其義。承佛神力。觀察十方而  
說頌言。

其地平坦極清淨

真金摩尼共嚴飾

諸樹行列蔭其中

聳幹垂條萃若雲

枝條妙寶所莊嚴

華燄成輪光四照

摩尼爲果如雲布

普使十方常現覩

摩尼布地皆充滿

衆華寶末共莊嚴

復以摩尼作宮殿

悉現衆生諸影像

諸佛影像摩尼王

普散其地靡不周

如是赫奕徧十方

一一塵中咸見佛

妙寶莊嚴善分布

真珠燈網相間錯

處處悉有摩尼輪

一一皆現佛神通

衆寶莊嚴放大光

光中普現諸化佛

一一周行靡不徧

悉以十力廣開演

〔疏〕後應頌不次。文分爲三。初六頌寶樹

摩尼妙寶芬陀利

一切水中咸徧滿

其華種種各不同

悉現光明無盡歇

疏次一頌白蓮華。

三世所有諸莊嚴

摩尼果中皆顯現

體性無生不可取

此是如來自在力

此地一切莊嚴中

悉現如來廣大身

彼亦不來亦不去

佛昔願力皆令見

此地一一微塵中

一切佛子修行道

各見所記當來刹

隨其意樂悉清淨

〔疏〕後三結嚴所因。謂由佛等力。明體用無礙。現而

常如。然此偈有多意趣。一者初一偈。則器世間。次

一智正覺。後一衆生。欲明一一事中。皆現三世間。

嚴影畧其文耳。又初明一果能現。次例一切莊嚴。後明塵塵皆爾。從畧至廣。從麤至細。又初明佛力。次彰願力。後隨樂力。又初自。後他。願通自他。又初明卽性無性。體本不生。次明卽相無相。現無來去。後明不壞於相。各見不同。方顯華藏之嚴。皆言亡慮絕。非可情求也。

○第六辨總結莊嚴

爾時普賢菩薩復告大衆言。諸佛子。諸佛世尊世界海莊嚴不可思議。何以故。諸佛子。此華藏莊嚴世界海一切境界。一一皆以世界海微塵數清淨功德之

所莊嚴

〔疏〕上來諸段。雖說莊嚴。猶未能盡。故今總顯。一一之境。若說不說。皆具刹海塵數功德。莊嚴是以文云。一切境界。長行文二。先標莊嚴難測。二何以下。徵釋所由。清淨功德。文合二義。一謂衆多果嚴。卽是清淨功德。二謂一一果嚴。從多清淨功德因生。以因望果。應成四句。謂多因一果。一因多果等。故隨一一事。卽曰難思。鈔應成四句者。文出二句。三一。一行。無德不招。廣如問明及昇。一因一果。四多因多果。隨修梵率品四句相融。故一一難思。是以頌云。但由如來昔所行。神通願力而出生。斯卽因也。若語果嚴。

畧有五相。一者令多。周給一切。一者令多者。第四偈。一切刹海咸周。二者令常。永無乏絕。第二偈中。靡暫停給他也。三者令妙。悅可衆心。第三偈中。其音是令常也。四者稱性。無生無相。第十偈中。無等無生。無有相。是稱性也。五者自在。鎔融無礙。偈文具之總斯五義。故曰難思。况因果相卽。第八偈等。能於一切微塵中。普現其身。淨衆刹。及第九偈。一刹那中。悉能現。皆自在也。

說頌言

爾時普賢菩薩欲重宣其義。承佛神力。觀察十方而

此刹海中一切處

悉以衆寶爲嚴飾

發燄騰空布若雲

光明洞徹常彌覆

摩尼吐雲無有盡

十方佛影於中現

神通變化靡暫停

一切菩薩咸來集

一切摩尼演佛音

其音美妙不思議

毗盧遮那昔所行

於此寶內恒聞見

清淨光明徧照尊

莊嚴具中皆現影

變化分身衆圍繞

一切剎海咸周徧

〔疏〕偈文有十。大分爲二。前六果嚴用勝。後四對因

辨果。前中分三。初四別明嚴用

所有化佛皆如幻

求其來處不可得

以佛境界威神力

一切剎中如是現



〔疏〕次一結屬現緣。

如來自在神通事

悉徧十方諸國土

以此刹海淨莊嚴

一切皆於寶中見

〔疏〕後一總結多類。

十方所有諸變化

一切皆如鏡中像

但由如來昔所行

神通願力而出生

〔疏〕後四對因辨果中。一由行願神通爲因。故獲變

化如鏡像果

若有能修普賢行

入於菩薩勝智海

能於一切微塵中

普現其身淨衆刹

〔疏〕二以普行勝智爲因故得一塵淨衆刹果

不可思議億大劫 親近一切諸如來

如其一切之所行 一剎那中悉能現

〔疏〕三由長時近友爲因故得剎那頓現之果

諸佛國土如虛空 無等無生無有相

爲利衆生普嚴淨 本願力故住其中

〔疏〕四彰淨國之意使倣而行之前半智境嚴卽無

嚴謂自受用上周徧無等法性之土體性無生二

皆無相後半悲應無嚴之嚴嚴徧法界無住之住

常住剎中上釋莊嚴竟鈔悲應已下後半卽他受用及變化淨一偈之中四

土具矣。藏海  
安布莊嚴竟

○第三明所持刹網。釋品目世界之言。又前明本  
刹。今辨末界。故兼染淨。文分三別。第一告衆許  
說

爾時普賢菩薩。復告大衆言。諸佛子。此中有何等世  
界住。我今當說

○二雙標二章

諸佛子。此十不可說佛刹微塵數香水海中。有十不  
可說佛刹微塵數世界種安住。一一世界種。復有十  
不可說佛刹微塵數世界

疏二章者。謂種及利。然利種依利海。諸利依利種。則寬陜可知。名從何得。欲明世界無邊。方便顯多。故立此名。謂積多世界共在一處。攝諸流類。故名爲種。如是種類復有衆多。深廣無邊。故名爲海。如積多魚以成一種。魚龍龜鼈。山泉島嶼。乃有多種。並悉攝在一大海中。而言世界無邊者。海外有海。海海無窮也。若爾種無別體。攬界以成。何以下文。說有形體。雖依種類以立種名。何妨此種別有其體。如多蠶孔其成一窠。豈妨此窠別有其體。上舉魚龍。蓋分喻耳。卽依後義。亦得名爲種性。依於此。

種能生世界。如依一禾。有多穀粒。舊經云性多取此義。恐濫體性。故改爲種。言有不可說者。若準下文。香海及種。皆有十不可說。梵本亦有。今脫十字。多是傳寫之漏耳。鈔蜂孔如刹。一窠如種。以禾喻種。以粒喻刹。禾能生穀。故有性義。

○三廣釋二章。文分爲二。初通明刹種不同。釋刹種章。二別明刹種香海。雙釋二章。二段各有長行與偈。今初長行文二。初列十門。後隨門廣釋。今初

諸佛子。彼諸世界。種於世界海中。各各依住。各各形

狀。各各體性。各各方所。各各趣入。各各莊嚴。各各分齊。各各行列。各各無差別。各各力加持。

〔疏〕然此十門刹種之異。並悉不離所依華藏。故云於世界海中。所列十事。與成就品。都望全異。彼通一切海。此明一海種故。若別別相望。互有互無。起具因緣。清淨佛出。劫住轉變。彼有此無。方所分齊。行列趣入。力持等五。彼無此有。依住形體莊嚴。無別彼此名同。前後互出。都有十五。皆顯十者。俱表無盡。而或異者。彰義多端。復有同者。恐濫全別。然與前同。已如前釋。不同五事。今當說之。各各方所。

者。若圓滿方所。周滿法界。無處不有。不卽三界。不離三界。若隨宜方所。隨十方中。向背各別。鈔釋此五句皆十八圓滿中意。次下當明。此中每句各具二義。方所二者。圓滿方所。卽自受用方所。如上引唯識。明自受用土相。若隨宜方所。卽他受用。及變化淨然。依佛地十八圓滿。唯約他受用說。今約圓通。故進入自受用。各各趣入者。依門趣入。約法門者。謂三下該變化。各各趣入。而無來去等。依門趣入者。彼有解脫。又互相現入。而無來去等。依門趣入者。彼有約法爲門。今但出此。又互相現入。事門。卽如向說。二者是約此宗。以辨門義。並如下說。各各分齊者。約事隨宜。廣陞異故。約佛分齊。則十方無際。分齊。分佛。卽自受用等。約佛。卽自受用土。各各行列。卽是道路。約事可知。約法。謂大念慧行。以爲游路。各各力加持者。卽食能

令住約法。廣大法味。喜樂所持。

○二隨門廣釋。但釋其二。謂依住。形體。餘七雖畧。義上已說。今初依住。

諸佛子。此世界種。或有依大蓮華海住。或有依無邊色寶華海住。或有依一切真珠藏寶瓔珞海住。或有依香水海住。或有依一切華海住。或有依摩尼寶網海住。或有依漩流光海住。或有依菩薩寶莊嚴冠海住。或有依種種衆生身海住。或有依一切佛音聲摩尼王海住。如是等。若廣說者。有世界海微塵數。

〔疏〕初列。後結。文並可知。



○二形狀

諸佛子。彼一切世界種。或有作須彌山形。或作江河形。或作迴轉形。或作漩流形。或作輪輞形。或作壇墀形。或作樹林形。或作樓閣形。或作山幢形。或作普方形。或作胎藏形。或作蓮華形。或作佉勒迦形。或作衆生身形。或作雲形。或作諸佛相好形。或作圓滿光明形。或作種種珠網形。或作一切門闥形。或作諸莊嚴具形。如是等。若廣說者。有世界海微塵數。

〔疏〕初列二十種。後結塵數不同。今初迴轉形者。禱褻往來之形也。壇墀形者。築土爲壇。除地爲墀。佉

勸迦者梵音。此云竹籥。

○三明體

諸佛子。彼一切世界種。或有以十方摩尼雲爲體。或有以衆色。或爲體。或有以諸光明爲體。或有以寶香。或爲體。或有以一切寶莊嚴多羅華爲體。或有以菩薩影像爲體。或有以諸佛光明爲體。或有以佛色相爲體。或有以一寶光爲體。或有以衆寶光爲體。或有以一切衆生福德海音聲爲體。或有以一切衆生諸業海音聲爲體。或有以一切佛境界清淨音聲爲體。或有以一切菩薩大願海音聲爲體。或有以一切佛

方便音聲爲體。或有以一切刹莊嚴具成壞音聲爲體。或有以無邊佛音聲爲體。或有以一切佛變化音聲爲體。或有以一切衆生善音聲爲體。或有以一切佛功德海清淨音聲爲體。如是等。若廣說者。有世界海微塵數。

〔疏〕先列後結。列中亦二十種。前十色相。後十是聲。會釋如前。

爾時普賢菩薩欲重宣其義。承佛神力。觀察十方而說頌言。

刹種堅固妙莊嚴

廣大清淨光明藏

依止蓮華寶海住 或有住於香海等

〔疏〕應頌有十。分爲六段。初一頌依住

須彌城樹壇墀形 一切刹種徧十方

種種莊嚴形相別 各各布列而安住

〔疏〕次一形狀及布列安住

或有體是淨光明 或是華藏及寶雲

或有刹種燄所成 安住摩尼不壞藏

燈雲燄彩光明等 種種無邊清淨色

或有言音以爲體 是佛所演不思議

或是願力所出音 神變音聲爲體性

一切衆生大福業

佛功德音亦如是

〔疏〕次三體性。

刹種一一差別門

不可思議無有盡

如是十方皆徧滿

廣大莊嚴現神力

十方所有廣大刹

悉來入此世界種

雖見十方普入中

而實無來無所入

以一刹種入一切

一切入一亦無餘

體相如本無差別

無等無量悉周徧

〔疏〕次三頌於三事。謂初二句頌所入門。次句方所。

第四句莊嚴。餘二偈中。廣大刹之本相。卽是分齊。

廣。陜。此。彼。相。入。亦。頌。趣。入。初。偈。以。多。入。一。後。偈。一。  
 多。互。入。皆。入。而。無。入。入。則。壞。緣。起。不。入。壞。性。用。皆。  
 入。而。無。入。下。通。釋。二。偈。入。無。入。言。前。偈。中。有。義。通。  
 後。偈。故。致。皆。言。總。有。三。意。初。一。反。釋。通。緣。起。相。由。  
 及。法。性。融。通。二。門。約。緣。起。門。者。凡。緣。起。法。要。有。三。  
 義。一。諸。緣。各。異。義。二。互。徧。相。資。義。三。俱。存。無。礙。義。  
 今。云。入。則。壞。緣。起。者。反。釋。不。入。入。則。失。緣。則。無。諸。  
 緣。各。異。義。言。不。入。則。壞。性。用。者。反。釋。入。義。則。不。得。  
 不。入。不。入。則。不。得。力。用。交。徹。故。無。互。徧。相。資。義。則。  
 壞。用。也。若。具。入。不。入。則。俱。存。無。礙。成。緣。起。門。言。法。  
 性。融。通。門。者。卽。性。之。一。字。夫。法。性。融。通。要。不。壞。相。  
 而。卽。真。性。入。則。壞。緣。起。者。無。可。相。入。不。入。則。壞。性。  
 用。者。則。性。不。徧。一。切。法。由。不。壞。相。又。要。由。不。入。方。  
 性。而。能。普。徧。方。是。法。性。融。通。義。也。

**能入耳。**二。要。由。不。入。方。能。入。者。卽。順。釋。也。亦。通。  
 二。門。唯。就。相。說。若。約。緣。起。門。要。由。諸。緣。歷。  
 然。不。入。方。得。相。資。徧。相。入。耳。若。約。法。性。融。通。門。者。  
 要。由。事。相。歷。然。方。隨。理。融。入。一。切。法。故。說。若。唯。約。

理無可。又約體本空。故無來無入。約相不壞。故如  
即入。第一義相。即不入。性即能入。今此一義。獨相獨性。  
本無差。以性融相。故得互入。三又約體本空。下亦  
但。不能入。要二相融。方能入。故言。又約體空。則無  
來。無入者。是若唯約性。無可即入。言約相。不壞如  
本。無差者。即若唯約事。不能即入。上二皆不入。義  
以性融相。故得互入者。即釋入義。是顯正義。謂不  
異理之一事。全攝法性時。令彼不異理之多事。隨  
所依理。皆於一中現等。一事攝理。既爾。多事攝理。  
亦然。則一事隨所依理。皆於多中現。故得互入。是  
法性融  
通門也

一切國土微塵中

普見如來在其所

願海言音若雷震

一切衆生悉調伏

疏次一願無差。謂塵容佛海等無差。故

佛身周徧一切刹

無數菩薩亦充滿

如來自在無等倫

普化一切諸含識

〔疏〕後一頌力持王伴。皆是神力任持。普化之言。兼於法味

○第二別明種刹香海雙釋二章者。謂香海依刹海。刹種依香海。諸刹依刹種。亦有長行偈頌。長行分三。初總舉諸海所依。二次第別顯海種及刹。第三總畧結釋。今初也

爾時普賢菩薩復告大衆言。諸佛子。此十不可說佛刹微塵數香水海在華藏莊嚴世界海中。如天帝網



## 分布而住

〔疏〕上來雖復但標利種及利二章。而釋依在中。皆云依海。故列海數。此多香海並在利海地面。故云所依。言如帝網者。大都分布。則似車輪。其有別者。謂帝釋殿網貫天珠成。以一大珠當心。次以其次大珠貫穿匝繞。如是展轉遞繞。經百千匝。若上下四面四角望之。皆行伍相當。今此香海雖在地面。分布相似。又有涉入重重之義。故云如也。

○第二次第別顯諸海種利。文分爲三。初辨中間一海。次辨右旋十海。後明十海所管之海。然十

海各管不可說佛刹塵數之海。總顯則有十不可說佛刹塵數。次第說者。但有一百一十一海。餘皆畧指。今初中央一海。文分爲二。先明香海。出華以持刹種。後有不可說下。明所持世界。今初

諸佛子。此最中央香水海。名無邊妙華光。以現一切菩薩形。摩尼王幢爲底。出大蓮華。名一切香摩尼王莊嚴。有世界種。而住其上。名普照十方熾然寶光明。以一切莊嚴具爲體。

〔疏〕文三。初香海名。以多華發光故。亦由菩薩行華。

而爲因故。二華名。謂以香摩尼。嚴此華故。又從摩  
尼底而出生故。約法。卽萬行圓明之所成故。海能  
有華。故受華名。華依於海。取海底稱。鈔海能有華  
無邊妙華光故。如蓮華池。池受華名。華依於海者。  
海以摩尼王幢爲底故。華名摩尼王莊嚴。如泥中  
華。華受泥稱。三種名。約事。寶光遠照故。約法。其世界種  
正是所含種子。一一皆有大智光明徧照法界義  
故。性德互嚴故。

○第二所持世界中三。初總舉大數。次其最下方  
下。別辨二十層大刹。後諸佛子下。類結所餘。今  
初

有不可說佛刹微塵數世界於中布列

〔疏〕初文可知

○第二別辨二十層大刹

其最下方。有世界名最勝光徧照。以一切金剛莊嚴光耀輪爲際。依衆寶摩尼華而住。其狀猶如摩尼寶形。一切寶華莊嚴雲彌覆其上。佛刹微塵數世界周而圍繞。種種安住。種種莊嚴。佛號淨眼離垢燈。

〔疏〕準標及結皆有不可說刹塵。其別辨中。但列十九佛刹塵數爲二十重。其能繞刹。但有二百一十佛刹塵數。下當會釋。二十層卽分二十段。最下層

中。文有七事。一舉名。鈔但有二百一十者。第一層二佛刹。一上加二爲三。第三層加三爲六。第四層加四爲十。第五層加五爲十五。第六層加六爲二十一。第七層加七爲二十八。第八層加八爲三十六。第九層加九爲四十五。第十層加十爲五十五。第十層有五十五。上十層一漸加。算數亦有五十五。而各有十。謂十一十二十三十四等。上十層更有一百。都有一百五十五。并下十層五十五。故有二百一十矣。問。既有二十層。何以但云十九佛刹爲主刹耶。答。以最下一層。但云一世界。非一佛刹。塵數世界。故云。從此一界。云。此上過一佛刹。微塵數世界。至第二層。故二層共有一佛刹。塵數刹耳。如。堅二千錢爲二百。最下取一錢。如最下一刹。此上過一百。取一錢爲第二層。方共一百耳。此上過一百。至第三層。方是二百。乃至二十層。方是一千九百文耳。故二十層成十九佛刹。思之。二辨下當會釋者。卽第三會能繞所繞類結之中。二辨際。謂世界所據之際。如金剛際。三依住。若準此名。

大同刹種所依蓮華。而舊釋云。於前無邊香海所  
出華上。更有此華。持此一界者。以例上諸層。別有  
依住。故爲此釋。何妨最下。依於總華。思之。四形如  
摩尼者。爲摩尼狀。有於八楞。似方不方。似圓不圓。  
故異下八隅。五上覆六眷屬。六眷屬者。卽經中云。種種安布。種種莊嚴。  
是辨眷屬。刹之相耳。七本界佛名。離二障垢。智眼清淨。照世  
如燈。然佛德無邊。各隨一義。二層已去。或有八事。  
謂加去此遠近故。或有九事。加純淨言故。準此。若  
無此言。卽通染淨。此上眷屬。漸加刹數。中間諸事。  
可以準知。

此上過佛刹微塵數世界。有世界各種種種香蓮華妙莊嚴。以一切莊嚴具爲際。依寶蓮華網而住。其狀猶如師子之座。一切寶色珠帳雲彌覆其上。二佛刹微塵數世界周而圍繞佛號師子光勝照。此上過佛刹微塵數世界。有世界名一切寶莊嚴普照光。以香風輪爲際。依種種寶華瓔珞住。其形八隅。妙光摩尼日輪雲而覆其上。三佛刹微塵數世界周而圍繞佛號淨光智勝幢。此上過佛刹微塵數世界。有世界各種種光明華莊嚴。以一切寶王爲際。依衆色金剛尸羅幢海住。其狀猶如摩尼蓮華。以金剛摩尼寶光雲而

覆其上。四佛刹微塵數世界周而圍繞。純一清淨。佛號金剛光明無量精進力善出現。此上過佛刹微塵數世界。有世界。名普放妙華光。以一切寶鈴莊嚴。網爲際。依一切樹林莊嚴寶輪網海住。其形普方而多有隅角。梵音摩尼王雲以覆其上。五佛刹微塵數世界周而圍繞。佛號香光喜力海。

〔疏〕五中云普方者。都望卽方。而一面之中。亦有多角。隅卽是角。文體容爾。

此上過佛刹微塵數世界。有世界。名淨妙光明。以寶王莊嚴。幢爲際。依金剛宮殿海住。其形四方。摩尼輪



髻帳雲而覆其上。六佛刹微塵數世界周而圍繞。佛號普光自在幢。此上過佛刹微塵數世界。有世界名衆華燄莊嚴。以種種華莊嚴爲際。依一切寶色燄海住。其狀猶如樓閣之形。一切寶色衣真珠欄楯雲而覆其上。七佛刹微塵數世界周而圍繞。純一清淨。佛號歡喜海功德名稱自在光。此上過佛刹微塵數世界。有世界名出生威力地。以出一切聲摩尼王莊嚴爲際。依種種寶色蓮華座虛空海住。其狀猶如因陀羅網。以無邊色華網雲而覆其上。八佛刹微塵數世界周而圍繞。佛號廣大名稱智海幢。此上過佛刹微

塵數世界。有世界。名出妙音聲。以心王摩尼莊嚴輪  
爲際。依恒出一切妙音聲。莊嚴雲摩尼王海住。其狀  
猶如梵天身形。無量寶莊嚴師子座雲而覆其上。九  
佛刹微塵數世界。周而圍繞。佛號清淨月光明。相無  
能摧伏。此上過佛刹微塵數世界。有世界。名金剛幢。  
以無邊莊嚴真珠藏寶瓔珞爲際。依一切莊嚴寶師  
子座摩尼海住。其狀周圓。十須彌山微塵數一切香  
摩尼華須彌雲彌覆其上。十佛刹微塵數世界。周而  
圍繞。純一清淨。佛號一切法海最勝王。此上過佛刹  
微塵數世界。有世界。名恒出現帝青寶光明。以極堅

牢不可壞金剛莊嚴爲際。依種種殊異華海住。其狀猶如半月之形。諸天寶帳雲而覆其上。十一佛刹微塵數世界周而圍繞。佛號無量功德法。此上過佛刹微塵數世界。有世界名光明照耀。以普光莊嚴爲際。依華旋香水海住。狀如華旋種種衣雲而覆其上。十二佛刹微塵數世界周而圍繞。佛號超釋梵。此上過佛刹微塵數世界。至此世界名娑婆。以金剛莊嚴爲際。依種種色風輪所持。蓮華網住。狀如虛空。以普圓滿天宮殿莊嚴。虛空雲而覆其上。十三佛刹微塵數世界周而圍繞。其佛卽是毗盧遮那如來世尊。

疏其第十三層主刹卽此娑婆言形如虛空者靜  
法云大小乘經並說虛空體無形質不可見相今  
云有形者迴文者誤梵本云三曼多周圍第疇皤  
疇曩天宮伽伽那虛空阿楞迦羅莊嚴蓋覆僧塞  
怛那形狀迴文應以形狀置周圍之前虛空安天  
宮之上然後合綴飾云其形周圍以空居天宮莊  
嚴之具而覆其上靜法此正深有理致今依經通  
之亦有理在謂空雖無形隨俗說故以俗典指空  
爲天謂天爲圓穹其形如斂故說天勢圍平野亦  
如法華云梵王爲衆生之父亦隨俗說耳謂天爲圓穹者

外典說天。或謂有形。故云天形穹隆。其形如斂。故天圓地方。若莊子云。天者自然也。則無形質。如法華者。卽第六經。藥王本事品中云。譬如大梵天王。爲一切衆生之父。此經亦復如是。爲一切衆生之父。以梵王劫初初生。後有諸天下降。梵王凡去。皆悉妄計。梵王爲父。諸經論皆破爲非。是外道計。今法華經。如來自引。以譬法華。豈佛不知。是父爲妄。故是世尊隨俗說耳。今亦隨俗說。天有形。於理何違。然今疏意。非是不許靜法之見。但已著在經。小有可通。卽爲會釋。不欲使人輕毀聖教耳。

此上過佛刹微塵數世界。有世界名寂靜離塵光。以一切寶莊嚴爲際。依種種寶衣海住。其狀猶如執金剛形。無邊色金剛雲而覆其上。十四佛刹微塵數世界。周而圍繞。佛號徧法界勝音。此上過佛刹微塵數世界。有世界名衆妙光明燈。以一切莊嚴帳爲際。依

淨華網海住。其狀猶如卍字之形。摩尼樹香水海雲而覆其上。十五佛刹微塵數世界周而圍繞。純一清淨。佛號不可摧伏力普照幢。此上過佛刹微塵數世界。有世界名清淨光徧照。以無盡寶雲摩尼王爲際。依種種香。欲蓮華海住。其狀猶如龜甲之形。圓光摩尼輪。栴檀雲而覆其上。十六佛刹微塵數世界周而圍繞。佛號清淨日功德眼。此上過佛刹微塵數世界。有世界名寶莊嚴藏。以一切衆生形。摩尼王爲際。依光明藏。摩尼王海住。其形八隅。以一切輪圍山寶莊嚴華樹網彌覆其上。十七佛刹微塵數世界周而圍

繞佛號無礙。智光明徧照十方。此上過佛刹微塵數世界。有世界名離塵。以一切殊妙相莊嚴爲際。依衆妙華師子座海住。狀如珠瓔。以一切寶香摩尼王圓光雲而覆其上。十八佛刹微塵數世界周而圍繞。純一清淨。佛號無量方便最勝幢。此上過佛刹微塵數世界。有世界名清淨光普照。以出無盡寶雲摩尼王爲際。依無量色香燄須彌山海住。其狀猶如寶華旋布。以無邊色光明摩尼王帝青雲而覆其上。十九佛刹微塵數世界周而圍繞。佛號普照法界虛空光。此上過佛刹微塵數世界。有世界名妙寶燄。以普光明

日月寶爲際。依一切諸天形摩尼王海住其狀猶如寶莊嚴具。以一切寶衣幢雲及摩尼燈藏網而覆其上。二十佛刹微塵數世界周而圍繞。純一清淨。佛號福德相光明。

○第三類結所餘。此中非唯結數。兼總顯上文所依住等。文分爲四。一總結都數。二各各所依下。結形類。三此一一下。結眷屬。四如是所說下。彰其所在今初。

諸佛子。此徧照十方熾然寶光明世界種有如是等不可說佛刹微塵數廣大世界。



疏卽舉本刹種。結有若干。此所結刹。定是主刹。以下文指此不可說佛刹。更有兩重繞故。其直上中間。但有十九佛刹。而結有不可說者。以旁論故。不爾。豈一刹種最下。唯一主刹。故知如向所說主刹。橫豎共論。有不可說。故下結其所在。云及在香河中。思之。鈔此所結刹者。以昔人云。經言此一世界者。此上二百一十佛刹。塵數之刹。耳。非此上不可說佛刹。塵數之刹也。以二百一十塵數刹爲所繞。兩重繞。竟方有不可說耳。故立理云。若不將此以會大數。一卽此刹種中。非唯有不說刹。塵數廣大世界。二卽三處說數相違。釋曰。此公意云。若所繞已有不可說佛刹。塵數。更加兩重繞刹。則有衆多不可說佛刹。塵刹也。言三處說數相違者。一是標中有不可說。說二中間說。但有二百一十。二是結文。兩重能繞。初則有不可說。後則

有無量不可說中間則不滿不可說故相違也此釋亦似有理而經此一一言遠承於前二百一十殊已隔越文中既云如是有一不可說佛刹微塵數佛刹卽云此一世界各有十佛刹微塵數廣大世界周而圍繞明知合繞前不可說也又以二百一十爲所繞者前中間說刹但超間明有二百一十望其文意直上十九佛刹微塵數之刹一各有衆多佛刹圍繞應有不可說不可說也何者且如最下一刹已有一佛刹微塵數佛刹圍繞向上過一佛刹微塵數世界方至第二層一刹有二佛刹微塵數世界圍繞此第一層向上至第二層中間諸刹何以無繞刹無繞則刹網不成故知直上一佛刹微塵數之刹一皆應有繞不能具說故有超過舉二十重耳既最下層一刹有一佛刹微塵數刹繞此上次第二刹更加一刹爲能繞第三亦加一刹如是漸上至百加百至千加千至萬加萬至滿佛刹微塵數到第二層還加一佛刹微塵數刹爲能繞故有二佛刹微塵數刹繞如是乃至第二十層亦復如是有一漸增故但直上至一佛刹微塵數世界并其能繞已有一衆多佛刹微塵數箇佛刹微塵

數世界不可知數。且就一期之數云不可說耳。明知所繞定是主利。若爾云何不與標文相違。標文但云一利種有不可說。佛刹微塵數世界故。既加兩重能繞多故。答此有二意。一言不可說者。就主標耳。二者其兩重能繞並不出不可說。刹塵利中何者。觀其文意。但是諸刹互爲主伴。爲相繞耳。如百人共聚一人爲主。則九十九人繞之餘。九十九人。一爲主。時皆得九十九人繞之。若不爾者。最下一刹已有一佛刹塵數世界圍繞。此能繞刹更有兩重能繞。已有一不可說不可說刹塵數刹也。思之明知互爲主伴。則本數不增。

○二結形類

各各所依住。各各形狀。各各體性。各各方面。各各趣入。各各莊嚴。各各分齊。各各行列。各各無差別。各各力加持。周而圍繞。所謂十佛刹微塵數迴轉形世界。

十佛刹微塵數江河形世界。十佛刹微塵數旋流形世界。十佛刹微塵數輪輞形世界。十佛刹微塵數壇墀形世界。十佛刹微塵數樹林形世界。十佛刹微塵數樓觀形世界。十佛刹微塵數尸羅幢形世界。十佛刹微塵數普方形世界。十佛刹微塵數胎藏形世界。十佛刹微塵數蓮華形世界。十佛刹微塵數佉勒迦形世界。十佛刹微塵數種種眾生形世界。十佛刹微塵數佛相形世界。十佛刹微塵數圓光形世界。十佛刹微塵數雲形世界。十佛刹微塵數網形世界。十佛刹微塵數門闍形世界。如是等有不可說佛刹微塵

數

〔疏〕文三初列十門。既言周而圍繞。則知旁去。鈔言而

旁去者。經中現說下狹上濶。如倒立浮圖。倒安鴈齒亦合更說上尖下廣。如正浮圖。仰安鴈齒。則上下櫛相比。皆悉周滿。間無空處。方為利網。上下四周皆悉相當。經欲棟別諸重。不能備舉。故且增數。說繞利殊。又欲令斜望相當。故此說所以梵網經云。世界不同。猶如網孔。若但取二百一十以為所繞。殊非得意。二所謂下。廣說十門形狀。有十八事。望前利種形中。闕須彌山形。及嚴具形。餘皆全同。但此約利為異耳。三如是等下。結歸都數。

○三結眷屬

此一一世界。各有十佛。刹微塵數。廣大世界周而圍

繞此諸世界。一一復有如上所說微塵數世界而爲眷屬。

〔疏〕然有兩重主伴。此一一者。指上不可說塵數也。若望前文。主利直上繞數漸增。今總相說。故云一一各有十利塵也。又是欲顯無盡義故。一一復有如上所說微塵數者。如上之言。文舍二義。一卽總指前能繞所繞之數。繞一世界。不欲繁文。故云如上。二者。如上亦用十佛利爲能繞也。依此。則似譯人文繁理隱。何不言一一復有十佛利塵數耶。若依前義。則譯者之妙。鈔依此則似者。若言十佛利。但有三字。今云如上所說則

有四字故爲文繁。但云如上所說。言不分明。卽是理隱。若依前義者。能繞所繞。其數旣多。但云如上。則言省畧。故云妙耳。雖有二釋。疏意存第二釋。但用十佛刹塵數而爲能繞。爲順經宗。明無盡故。前後體勢。類皆然。故餘如疏文。細尋可見。

○四彰所在

如是我所說一切世界。皆在此無邊妙華光香水海。及圍繞此海香水河中。

**疏**卽最中香海。旣言及在香水河。明知旁去。

鼓山比丘太安刊刻  
華嚴經華藏世界品疏論纂要第十六  
卷流通伏願遊華藏海入禱華林修普  
賢之願王圓毘盧之果海仰報四恩普  
資三有  
康熙二十二年九月十日華藏室謹題

大方廣佛華嚴經疏論纂要卷第十六